

PEMBERITAHU PERTANYAAN DEWAN RAKYAT

PERTANYAAN : LISAN

DARIPADA : Y.B. DATUK MOHD IDRIS BIN JUSI
[BATU PAHAT]

TARIKH : 16.5.2016

SOALAN :

Datuk Mohd Idris bin Jusi [Batu Pahat] minta **MENTERI PENDIDIKAN** menyatakan persiapan guru-guru, bahan-bahan pengajaran dan pembelajaran, murid-murid dan ibu-bapa bagi memastikan Program Dwibahasa (DLP) tidak mengalami kegagalan seperti dialami oleh Program Pengajaran dan Pembelajaran Matematik dan Sains dalam Bahasa Inggeris (PPSMI).

JAWAPAN

Tuan Yang di-Pertua,

Dual Language Programme (DLP) merupakan program pilihan sekolah setelah mengambil kira kesediaan guru untuk melaksanakan pengajaran dan pembelajaran (PdP) mata pelajaran Sains atau Matematik dalam bahasa Inggeris dan kemampuan sekolah berdasarkan syarat-syarat yang ditetapkan serta mendapat persetujuan ibu bapa murid-murid terlibat. Pelaksanaan DLP telah dirancang dengan baik termasuk dengan menyediakan pelbagai sokongan antaranya garis panduan pengoperasian, Dokumen Standard Kurikulum dan Pentaksiran (DSKP), Panduan Perkembangan Pembelajaran Murid (PPPM), contoh rancangan pengajaran harian dan bahan program

orientasi Sains dan Matematik dalam bahasa Inggeris untuk rujukan guru dan sekolah.

Untuk makluman Ahli Yang Berhormat, sekolah rendah yang melaksanakan DLP juga dibekalkan dengan buku teks KBSR dalam bahasa Inggeris yang isi kandungan telah disemak dan disunting selari dengan perkembangan terkini. Semua sekolah rendah DLP dibekalkan set buku rujukan, bahan digital dan panduan guru peringkat pendidikan rendah yang lengkap sebagai rujukan panitia dan pusat sumber sekolah, serta pemetaan isi kandungan buku rujukan kepada kurikulum sekolah rendah. Pada masa yang sama, semua sekolah menengah yang melaksanakan DLP turut dibekalkan dengan buku teks KBSM dalam bahasa Inggeris.

Kementerian Pendidikan Malaysia juga menyediakan sokongan kepada guru dari semasa ke semasa berdasarkan keperluan mereka seperti sokongan dan bimbingan kepada guru oleh Jabatan Pendidikan Negeri dan Pejabat Pendidikan Daerah bagi memastikan program DLP ini dapat dilaksanakan dengan lancar